

1991ko Riau-riauko liskarren inguruko epaiketa hasi dute

Fiskalak ez du zigorrik eskatzen, eta Udalak, berriz, bai

Erredakzioa / Iruñea

1991eko San Fermin jaietako Riau-riaua bertan behera uztea eragin zuten liskarretan parte hartzea leporatzen dieten 10 gazteren aurkako epaiketa hasi zen atzo

Iruñeko Entzuteagian. Gazteen abokatuek aske uzteko eskatzen dute, eta fiskalak ez du zigorrik galdegiten; Iruñeko Udalak, aldiz, 5 auzipeturentzat 5 urteko kartzela zigorra eta besteentzat 10 hilabeteko arrestatzea eskatzen du.

1991-EKO sanferminetan, bertan behera utzi zuten uztailak 6ko bezperetako martxa, Riau-riaua, Udaletxe Plazako liskarrak zirela kausa. Liskarretako bideo grabazioetan oinarriturik, 10 gazte auzipetu zituzten. Atzo, haien aurkako epaiketako lehen saioan, bideoak ikusgai izan ziren. Defentsako abokatuek eta Udalaren izenean ari den akusazioak bideoen balioari buruzko eztabaida izan zuten. Abokatuen iduriko, bideoak ez dute froga gisa balio, hainbat irregulartasun direla medio. Akusazioaren aburuz, berriz, bideoak baliozkoak dira.

Epaiketa zuzentzen ari den Iruñeko Entzuteagiko 1 Auzitegiko Isabel Buesa epaileak atzoko saioan ez zuen argitu bideoak haren ustez baliogarriak diren: epaiketan bideoak ikustea eta epaian baliogarriak diren argitzea erabaki zuen. Auzipetuek argi zuten haientzat grabazioek ez zutela balio, eta hori zela kausa, ez zieten akusazioaren bideoen inguruko galderei erantzun. Besterik gabe, bere garaian egin adierazpenei eutsi zieten: liskarretan ez zutela parte hartu eta irudietan beren burua ez



1991ko Riau-riauean izandako istiluen irudi bat.

zutela ezagutzen adierazi zuten.

Dena dela, atzoko epaiketan ez ziren auzipetu guztiak; izan ere, Alberto Lopez ez zen epaiketara joan. Hori dela eta, 9:30etan hastekoa zen saioa ordu eta erdi atzeratu zen. Nolanahi ere, atzoko ez da duen lehen atzerapena. 1997ko irailean egitekoa zen, baina defentsako abokatuek Udala akusazio moduan aitzeararen inguruko hainbat kexu aurkeztu zituzten, eta atzo arte atzeratu zuten.

Defentsako abokatuen arabera, auzipetu guztiek aske

geratu beharko lukete; izan ere, lege-haustea preskribituta daude, eta gazteek indefentsio judiziala pairatu dute. Fiskalak ez du zigorrik eskatu. Iruñeko Udaleko akusazioaren arabera, liskarrak gertatu zirelarik adin txikikoak ziren 5 auzipetuek 10 hilabeteko arrestatzea pairatu behar dute, eta gainontzekoek 5 urteko kartzela zigorra. Horretaz gain, akusazioaren ustez, auzipetu guztien artean liskarrek Iruñeko Udaletxean eragin zituzten 5 milioi pezetako kalteak ordaindu beharko dituzte.

l a b u r r e a n



XOUSE SIMAL

Torturen aurkako kontzentrazioa egin zuten atzo Bilbon.

■ Polizia bik deklaratu dute tortura auzi batean

POLIZIA inspektore bik deklarazioa egin zuten atzo Bilboko 10. Instrukzio Epaitegian Ibai Kerejetak salatutako tortura eta tratatu txarrak argitzeko auzian. Atxiloketan eta garraioan parte hartu izana onartu zuten, eta tratatu txarrak ukatu. Deklarazioak iraun zuen bitartean, AABetako hogeitabat lagunek tortura salatzeako pankarta bi zabaldu zituzten entzutegiaren aurrean. Aitziber Bañuelosek oroitarazi zuen 1998an 96 tortura kasu salatu zirela epaitegietan. AABetako Bizkaiko koordinatzaileak inkomunikazioa eta legedia anti-terrorista oro har indargabetzeko eskatu zuen. x

■ Santi Hernandoren aurkako epaiketa bertan behera

SANTI HERNANDO HBko mahaikide eta parlamentario ohiaren aurkako epaiketa bertan behera geratu zen, EAEko Auzitegi Nagusiak aintzat hartu baitzuen defentsak argudiatutako arrazoi bat: kalifikazioak egin zituztenerako Hernando ez zela parlamentarioa, alegia. Manuel Zorrilla epailea buru duen epaimahaiak ez zuen onartu epaiketa bertan behera geratzea magistratuak euskaraz epaitzeko gai ez zirelako. Fiskalak 20.000 pezetako isuna (800 libera) eskatu dio Hernandori, falta txiki batengatik, eta lau hilabete eta 150.000 pezetako isuna harekin batera epaitu zuten Aitor de la Torre gazteari, Ertzaintzari kontra egiteaz akusatuta. x

■ Joxean Etxeberria eta Josu Urrutikoetxea presoek Eusko Legebiltzarreko batzordeetan parte hartuko dute

EH-K atzo jakinarazi zuen Eusko Legebiltzarreko 14 batzordeetan parte hartuko duten legebiltzarkideak zeintzuk diren. Josu Urrutikoetxea eta Joxean Etxeberria presoak ere Batzordeetan ariko direla adierazi zuten. Urrutikoetxea Hezkuntza eta Kultura Batzordean, Giza Eskubideen Batzordean eta Europako Gaietan eta Kanpo Ekintzarako Batzordean izango da; eta Etxeberria, berriz, Lurralde Antolaketa, Garraio eta Ingurugiro Batzordean, Bateraiezintasun Batzordean eta Nekazaritza eta Arrantza Batzordean. x